

18. juli 2019

Inatsisartunut suleriaatsimi § 37 imm. 1 naappertorlugu, Naalakkersuisunut apeqquteqaatit uku saqqummiuppakka.

- 1) Sunaana tunngavigalugu illoqarfiit nunaqarfiillu killeqarfiisa avataanni sissamiit 100 meterinik qaninnerusumi illuaqqiortoqarsinnaanera inerteqqutigineqartoq?**
- 2) Inatsit 2003-imeersoq sioqqullugu, sissamiit 100 meterimik qaninnerusumi illuaqqat sananeqarsimasut sutigut ajoqusiisimappat imaluunniit akornutaappat?**

(Anders Olsen, Inatsisartunut ilaasortaq, Siumut)

Tunngavilersuut:

Pinngortitamik illersuineq pillugu Inatsisartut inatsisaat nr.29, 18.december 2003-imeersoq §26 malillugu, illunik sissamiit 100 meterimik qaninnerusumi inissiisoqarnissaa inerteqqutaavoq. Paaserusunnarporlu suna tamatumunnga tunngaviunersoq?

Ukiuni kingullerni asimi illuaraqarneq nunatsinni atugaaleraluttuinnarpoq nuannarineqaleraluttuinnarlunilu.

Pinngortitamilu ilorrisimaarneq tamatsinnut nuannersuullunilu pilluarnartuusarmat tamanna soorunami tapersersornarlunilu nuannaarutaasariaqarpoq.

Illuaqqiornissami pingaarutillit ilagivaat umiatsilivigissumi angallatillu isigisinnaallugit illuaraqarnissaq, soorunamilu qajannaatsuunissaa anguniarlugu qaarsumi toqqaveqarnissaa pingaartuusarluni.

Taamaattumik apeqqutigisariaqarpoq 100 meterimik ungasissusiliisimaneq ilumut tulluartuunersoq sumillu tunngaveqarnersoq?

Aammalu kissaatiginarpoq ukioq 2003 sioqqullugu sissap/immap qulinnguani illuaqqat sananeqarsimasut sutigut ajoqusiisimanerat akorngutasimaneralluunniit Naalakkersuisut paasissutissiisutigissagaat.

Apeqquteqaatigisama ullut suliffiusut qulit iluanni akineqarnissaat kissaatigaara.